

鄭端簡公奏議

鄭端簡公奏議卷之六

門人項篤壽校梓

淮陽類

申明兵備職掌疏

題爲再乞 天恩申明兵備官員職掌以固海防事
案查嘉靖三十三年三等月內倭寇攻圍通州其時
江北地方因無專官整理兵備以致沿海竈丁附近
居民俱被殺戮慘不可言該臣會同巡按直隸監察
御史李逢時莫如士題乞要添設兵備副使一員專
管淮揚海防兼理軍民商竈詞訟及屯田河道捕盜

等項事務荷蒙 聖恩俯念東南水陸要地特 勅
該部議擬添設兵備副使一員該部仰承 德意選
調湖廣按察司副使張景賢前到通泰整飭兵備八
月十五日倭寇一船約有九十餘人侵犯海門縣呂
四場地方本官領兵征剿擒斬盡絕已該臣具 題
外九月十三日又有倭寇一船約三十餘人繼至復
犯如臯縣豐利場地方亦被本官斬獲無遺寔皆
皇上天威震疊吏部選任得人之所致也地方幸甚
臣愚幸甚但查得吏部咨文內開稱一應軍務悉聽
新設兵備官從宜酌處其餘軍民詞訟等項俱不必

干預與會

題原議稍有不同其時恭候

勅書

奉敢

讀奏九月二十八日本官抄捧

勅諭到臣

隨令通行各屬欽遵外臣竊惟

綸綍下臨官常增

重約束所至軍政自嚴所設兵備官許以從宜酌處
是假之事權俾得展布也而復不許干預軍民詞訟
則是遇賊之時責以衛民生而休兵之日不得親民
事矣臣愚復思部議重在用兵以爲權貴專一事忌
多岐本官不理詞訟則可以專心軍務不爲別衙門
掣肘况徐州既有兵備管理淮揚事務則新設兵備
似亦不必再行干預但軍民本同一體兵刑原非二

事須得問理詞訟則人情土俗罔不周知而官方政體亦得覺察緩急用人之時俱無阻隔不通之患若使獨專軍務不理詞訟則名為兵備而迹類叅將假令徐州兵備可以兼理則何用復設海防為哉且朝廷建立按察司官專為伸冤理枉糾察庶僚所以兵備官必用憲臣臣查各省每道既有分巡專管刑名而兵備尤兼理詞訟彼此自不相妨况通泰海州濱海一帶三十場盡皆竈戶鹽商倭至必從此登岸內侵我兵亦必從此團結外禦今兵備乃不得管束致使運司等官徃徃相抗一應戰守事宜調度不前

臣非不知擬議既定即當奉行但事干軍情重務地方安危所係不敢緘默如蒙乞 勅該部通查臣等先今題 請事理再行詳議許令海防兵備官無理軍民詞訟等項事務運使分司得以一體督率沿海竈丁得以一例整棚庶幾體統相維號令齊一如本官行事垂方臨敵退避聽臣與巡鹽御史叅 奏處治則彼此無觀望之嫌而地方受平定之福矣嘉靖三十三年十月十一日進奉 聖旨該部知道欽此該吏部議覆看得總督漕運兼巡撫鳳陽等處地方兵部右侍郎兼都察院右僉都御史鄭 題稱乞要

將海防副使許其無理軍民詞訟等項事務運使分
司得以一體督率沿海竈丁一例整棚一節爲海防
副使本爲海寇猖獗而設故本部原擬止令專管海
防不必干預軍民詞訟欲其專意戎務且免受制他
司蓋本重其責任而非以削其事權也今巡撫侍郎
鄭 因見地方稍寧海防可緩復欲令其管理軍民
詞訟等事若果如所議則鹽法江防屯田河道提學
巡倉等衙門俱得批委節制未免疲于奔命而海防
本務或反致踈虞亦未可知且徐州原設兵備一員
所轄淮揚徐三府州詞訟皆得專之今若又令海防

兼理軍民詞訟不無政出多門民聽於二非制法之
便也况本部原題明開一應有關海防事務悉聽處
置則沿海鹽丁正係部民首宜整棚運司官員即其
轄屬遇有詞訟但涉海防即聽管理固未嘗不受一
詞不理一事也所不干預者惟鹽法江防屯田河道
提學巡倉等衙門不得批委致妨本務耳合無再行
撫按官仍照原降 勅諭內事理并本部原擬責任
督行副使張景賢逐一遵照其所屬淮揚二府府運
等衙門上下體統并填註考語俱照徐州兵備事體
施行所有前項 勅書該載已明似不必另行改撰

以滋瀆擾等因嘉靖三十三年十二月初二日太子少保本部尚書兼翰林院學士李 等具題初四日奉 聖旨是欽此

剿平倭寇首級疏

題為仰仗 天威剿平江北倭寇斬獲首級事嘉靖三十三年十月初一日據整飭淮揚海防兵備副使張景賢呈本年九月十三日豐利場報北海漂來沒桅船一隻上有倭寇二十餘人捉住隔港撈網男子一人上船等情到道督剿間准梅叅將報前賊因官兵追捕荒張棄下原船逃走川沙窪搶石港場葛竈

戶海船一隻隨潮開洋往東南去訖十六日各倭將
虜去竈戶陳栩殺死又據如臯縣西場巡檢司報倭
船二隻約有五十餘人登岸虜去竈戶吳寬十七日
拚茶塲攢典倪堂報倭賊二十餘人打開竈戶官邵
等家門扇搶虜衣服財物放火殺人戳傷竈戶王約
等男婦拚茶塲備倭千戶張祚率同保正繆滂趙谷
領兵對敵三合被傷竈戶董智等數十餘人斬獲倭
寇首級十顆餘寇漫散天晚不知去向隨將倭船一
隻并所搶民人吳隆船一隻放火烧燬又據泰州稟
報本月十九日豐利塲副使楊虎督領驍勇桑析等

與賊交戰斬獲首級八顆截傷不知其數餘賊逃走
得獲倭方二張箭五枝倭力四把被賊殺死驍勇許
昂桑本地方王錦管春截傷桑析等二十日備倭指
揮王表領官軍追捕斬獲首級四顆三起斬獲共二
十二顆餘賊被趕下海潮水淹死無存俱已盡滅及
查八月內呂四場倭寇已該本道親統官軍斬獲首
級共計七十四顆銃彈打死五人前後通共斬獲首
級九十六顆銃彈打死五人其截傷燒溺死者不在
數內等因到臣隨據分守通泰叅將梅希孔并兩淮
運司判官馬倫各報前來及據揚州府并高郵州捉

獲倭寇三人批發該府通判史朝賓審問外據此案
查先爲仰仗 天威剿滅江北倭寇事本年八月十
五日倭寇突入呂四等場地方九月初十日剿滅已
於本月十五日具 題外本月十八等日各屬飛報
豐利場又到倭船內有倭寇登劫地方隨行各官進
兵剋期剿捕去後今據前因爲照倭寇類多姦細覘
知江北驍勇官兵已赴江南遂敢屢窺江北八月十
五日至九月十三日不過踰月三次登劫節被副使
張景賢等官兵追捕陸續剿絕仰仗 天威地方稍
寧臣待罪海防不勝幸甚即今江南倭寇見有總督

軍務南京兵部尚書兼右都御史張 水陸會兵往
來夾擊切恐窮寇乘風北走尤爲可慮即欲番調徐
沛潁毫兵勇前來防禦又緣地方災荒人情易動難
安已經移咨總督軍門請發原調江北兵船回守信
地分布戰守其有功失事人員通候委官查明至日
另行具奏外嘉靖三十三年十月十一日進奉
聖旨兵部知道欽此該本部議覆爲照前項倭寇節
被各官剿滅委可嘉尚已經奉 旨陞賞似難再議
但倭夷狡猾每每乘虛入犯在我隄備豈容顧彼失
此所據前因相應議擬合候 命下移咨總督部御

史張 查照江南江北賊勢將原調兵船酌量議處
仍行巡按直隸御史備查有功失事人員分別具奏
以憑覆請 定奪等因嘉靖三十三年十二月初五
日太子太保本部尚書聶 等具題本月初七日奉
聖旨是欽此

佃種昭陽湖櫃外餘田疏

題爲陳愚見以利民生以濟河渠事卷查嘉靖三十
二年七月二十八日准工部咨該刑部左侍郎吳
題條陳闢餘田內開櫃水之外餘閒田地頗稱肥饒
今運道河身既高水櫃之水窪下不能激之使上名

雖接濟未收實用如沛縣昭陽湖櫃外餘地約七百餘頃置之荒蕪委爲可惜若召民佃種每歲納銀沿河諸湖可得銀萬數兩貯之河道或打造剥船或雇倩夫役或買辦椿草或修理閘座則官得贍用民得安生其積水之處若有侵占仍照新例問罪等因奉聖旨該部看了來說欽此欽遵隨該本部議照前項水櫃係經漕河初制近年兵部右侍郎王以旂不過申明而振舉之今本官復題稱運河身高水櫃窪下不能激之使上是不但謂櫃外餘田置棄可惜似并水櫃以爲無用但事關國計難便擅議相應行勘

合候 命下本部備行漕運河道及巡撫各都御史
并管河管閘郎中主事等官仍咨都察院轉行巡按
巡河御史督同該司府守巡兵備管河官查照先今
事理將前項昭陽等湖水櫃逐一踏勘先年因何建
置及後因何廢棄自侍郎王以旂修復之後曾否有
何實用即今各間曠地畝若干應否召民佃種歲收
子粒若干有無於官民兩便務要斟酌利害從長計
議會奏 定奪等因題奉 欽依備咨前來已該前
任都御史吳 會同總理河道都御史曾 巡按直
隸監察御史李逢時黃國用劄行徐州兵備道勘議

去後該臣接管據沛縣申前事又經批行該道併勘
續據兵備副使劉天授呈稱依奉行據沛縣回申查
得本縣昭陽湖原額地七百一十八頃三十七畝五
分除用過地二百一十八頃四十四畝八分九釐築
爲水櫃尚餘地四百九十九頃九十二畝六分一釐
數外另有滕縣湖地七十二頃三十六畝係隸山東
地方緣由到道據此卷查前事會委豐縣知縣戴輔
會同沛縣署印主簿都永清親詣昭陽湖逐一沿丘
履畝踏勘明白審據告人夏旺張鹹等各稱先祖於
洪武年間開墾承種久查原行始末卷案先年節被

黃水淹沒縣治倒塌文卷湮溺無憑查理彼因本湖
淹淤不堪蓄水後自嘉靖七年間蒙工部管閘主事
衙門查勘前項地畝高窪有收坐派租銀不等遞年
依期完納專備河道公用嘉靖十八年蒙工部管理
南河郎中衙門明文坐派湖地七百一十八頃三十
七畝五分每年每畝徵租銀一分共銀七百一十八
兩三錢七分五釐俱奉明文取解修理閘座河道用
盡嘉靖二十年七月內蒙本道前任屠副使案驗該
蒙督治漕河兵部王侍郎案驗該本部題爲遵明
旨查復官湖以濟漕河事備仰本縣即便省諭原種

昭陽湖地人戶三百五十八戶若有祖父置產而子孫不知者從實首官革退原徵租銀盡行除免見種秋禾姑准自收其徵納租銀底簿備存待勘處果用民田若干方許計畝抵換或量給官價敢有豪強佔種有司仍前徵租定行拏問等因本縣遵依查明計畝抵換外實用過地二百一十八頃四十四畝八分九釐纂爲水櫃外餘地四百九十九頃九十二畝六分一釐并北接滕縣官湖地七十二頃三十六畝俱封禁不許耕種一向遵守今蒙查勘爲照前項湖地始築水櫃引洩水利接濟運渠誠爲良圖後因節年

水大發致將水櫃淹淤高厚據其地形較比外餘
曠地畝稍爲平坦若欲興復挑濬但地里廣濶所
費工力太多擅難輕議除水櫃奉有欽依相應存
留外其櫃外四面間餘田地壅淤尤爲高阜悉皆曠
廢遂至拋荒然以有用之地而置之無用又減數百
兩租銀以損修河之費合無仍歸先年失業之民領
種每畝計二百四十步加徵租銀三分每年筭約共
銀一千七百餘兩貯之河道公用似與官民兩利一
方窮困之民有所仰給并稱滕縣湖地及南旺馬場
安山三湖該山東委官兗州府黃同知徑自勘報等

因已該陞任副使李天寵會同管理南河工部郎中
彭澄沽頭關主事曾鑑疏請昭陽湖踏勘得本湖先
年窪下納滕縣諸泉之水設漕之初導引接濟運道
四面隙地聽民播種至正德年間黃河從沛濁流灌
激淤迷湖形高下俱堪耕種百姓以爲恒業嘉靖七
年以來議令徵租嘉靖二十年間漕河涸竭議復官
湖擇取稍下一區築爲水櫃以備蓄洩四外餘田封
禁不許耕種數年之後霖潦湮淤圍堤坍頽櫃內北
外勢高尺餘泉流至此不能停積徑達金溝歸入運
河議得前湖開漕之始窪下者堪以積水間隙者聽

民耕作是以公私兩便繼因黃河湮淤照畝科租則少濟公家厚裕民利至於築櫃之後湖身增高勢自不能停水餘田封禁小民遂爾失業即今櫃形既存以俟相時修濬蓄洩其四外閒田本與水櫃不相妨礙棄置荒蕪誠為可惜內滕縣地畝聽該省徑自議處其沛縣餘地共計四百九十九頃九十二畝六分一釐俱平衍膏腴應歸先年失業之民領種歲收子粒豐歉難定每畝加徵租銀三分以備河道公用未久可行官民兩利緣由回報去後今蒙前因為照昭陽湖櫃外餘田實該沛縣地四百九十九頃九十二

畝六分一釐既經前道會同各官勘議本與水櫃無妨相應召民佃種公私並濟事體調停無容別議等因到臣據此會同總理河道工部右侍郎兼都察院右僉都御史曾 巡按直隸監察御史劉世魁莫如士議照昭陽湖櫃外餘田既節經該道會勘議報前來相應依擬如蒙乞 勅該部再加詳議合無備行臣等轉行沛縣掌印管河官將昭陽湖櫃外前項餘田四百九十九頃九十二畝有零召民耕種自嘉靖三十四年爲始每畝加徵租銀三分大約每年計收租銀一千四百九十餘兩收貯官庫以備河道公用

其壩內積水湮淤去處嚴督該管官司以俟相時修濬蓄洩濟運仍出榜禁諭小民不許將應禁積水去處一槩溷占盜決水利如違照例問遣其撥分佃種務令肥瘠相兼不許勢豪之家揀取肥饒偏累小民如此庶法令昭彰官民兩利嘉靖三十三年十月十一日進奉 聖旨該部知道欽此該工部併覆後題申明三湖禁例疏內

秋災再請蠲減稅糧疏

題為亟處兵荒極重地方以安人心以消內患事嘉靖三十三年九月二十九日准戶部咨前事該本部

題看得南直隸浙江等處皆 國家財賦重地比因

倭寇竊發水旱荐臻老稚轉於溝壑田廬半為丘墟

以致尚書張 侍郎鄭 都御史王 御史趙炳然

陶承學有此論奏無非目擊時艱同為固本寧邦之

意但民瘼固為可恤 國計尤所當慮近來各司府

奏災類要破格蠲免而各邊軍餉則又出額加增無

以漕運糧斛改折太多空運不絕太倉儲蓄已不足

以制三年之用誠恐馴至空乏官軍脫幘將何以待

之矧臨德二倉貯積已空輒難輕議支運恭候 命

下本部移咨南京兵部尚書張 總督漕運兵部右

侍郎鄭 巡撫浙江接管都御史李 并咨都察院

轉行各該巡按御史備行守巡該道督同蘇松淮揚
杭嘉等府揚州海寧等衛所滁徐等州及隔遠申報
未到被災去處各掌印管糧官員通將各州縣衛所
查係未被倭寇及雖經過不至重傷與水旱災傷三
分以下無論起存照舊追徵不免外其被倭被災地
方即查照先次題 准事理及勘災體例分別已未
被災州縣里分及水旱災傷輕重分數係民田者即
於存留數內照例減除係屯田者亦准照例以十分
為率除三分減免外其餘七分從輕折收價銀解送

應納倉庫收貯其績報災傷處所悉照此例不許官吏里書屯軍人等增減分數那移等則悉聽撫按查究治罪至於內府白糧漕運米石係額不可缺乏之數合查照議單本府有災於附近有收府分及所屬無災州縣通融派補務期足數如各處俱災或撥補不盡即星夜具奏以憑覆議定奪紹興府所屬州縣邊倉糧米既值海防缺用之時姑准本折無微以備本處支用其折米派剩等銀仍舊解部其漕運衙門扣留折糧銀一十萬兩原議南方米賤糴買上倉聽撥支運即今既稱地方災傷米價騰貴則前項

銀兩相應仍留在庫待後另議羅買至今冬來春青黃不接之時如小民得以過遣不必賑恤若果饑寒相迫日不聊生聽各該撫按衙門查有見在倉糧并無碍堪動銀兩通融賑給先將查勘過被倭被災地方蠲免過民屯錢糧撥補已未完漕糧數目限十月以裏具奏等因題奉欽依備咨前來案照先為疊遭異常水旱蝗災乞寬秋糧以救民生事該臣題開撫屬地方今歲秋災重大議將各府州縣兌運糧米比照上年事例折徵銀兩改兌糧米改撥支運存畱屯糧照例減免緣由具題去後續據邳海泗高

壽等州并桃源清河山陽宿遷睢寧沐陽寶應興化儀真鳳陽虹縣潁上懷遠盱眙五河臨淮英山碭山等縣及徐州徐州左高郵儀真泗州壽州長淮鳳陽宿州淮安大河等衛興化鹽城海州中前等所各報秋災均乞免糧案候間今准前因除糴糧事宜備行淮陽等府將扣留糧銀一十萬兩照舊貯庫待後明文至日收買外其勘災一節緣臣撫屬正係各處俱災撥補不盡地方隨經通行徐潁二道及各府州掌印管糧官員從公勘議續據淮揚鳳廬四府并徐州各申稱勘得所屬地方自夏至秋先遭久雨復罹旱

鹽田禾失收小民絕望通州海門如臯又被倭寇殘
害已該巡撫衙門具 奏議將兌運米折徵銀兩改
兌米改撥支運近該戶部查得臨德二倉無糧可支
復行前來通徵本色但各州縣委的災傷小民困極
即今米價每石騰至銀一兩來春就加二三尤恐不
敷緣起運錢糧乃 國用額數在所不免况臨德二
倉今雖無糧候至秋徵或有餘積若通徵本色恐終
不能完納所係非輕若不從長議處將來追徵不過
促之流移死亡合無俯念民窮將各府州縣兌改糧
米酌量本折徵兌稍撥支運得上年一半之數庶寬

一分民受一分之賜今將議定糧數均乞具奏及據徐州兵備副使劉天授潁州兵備僉事朱舜民各呈議相同等因各到臣據此竊照因田制賦本國家惟正之供若使時值豐收自當照數徵納柰今歲秋災委的重大仰荷聖恩已將存留屯糧照例減免又俟冬春青黃不接若果饑寒相迫查議賑濟軍民感戴無已但各屬兌運糧米固已酌量徵收本色其改兌糧米委難併徵臣欲遵照議單本府有災於附近有收府分及所屬無災州縣撥補况各府州縣俱有災傷難以改撥若不及時具奏誠恐追併不

免逃竄今各屬申災紛紜不絕且臣出入往來或遇
放告之期鄉民父老遮道盈庭環泣訴告往年災傷
猶可支持今歲秋災小民困苦衣食無聊雖云二麥
已種眼前實難過遣望乞寬糧以救倒懸哀聲載道
觸目酸心臣無詞可對只得宣播 聖恩曲加撫慰
聽候 明旨夫小民疾苦臣既備知不敢不鳴於

君父之前也又查得上年秋收之時米一石不過價
銀五錢今價已倍於上年矣上年蒙 恩准撥支運
米八萬石今不敢望如前數但乞准撥四萬石均派
重災及被倭地方與折色銀兩相兼徵解伏望 皇

上天地父母之仁乞 勅該部從長計議合無 俯
從所 請將各府州縣今歲秋糧兌改米石應徵本
折及支運糧數行令臣等查照會派徵兌施行如此
不惟錢糧易於完納抑且民困得以稍蘇今將各府
州申議應徵本色折色支運糧數開坐具本嘉靖三
十三年十月十一日進奉 聖旨戶部知道欽此
計開擬議徐賴二兵備道并各府州申乞
兌改本折及支運糧數

一淮安府申稱原額正兌米二萬五千石俱徵本
色內奉例截畱軍餉米一萬七千八百石外起

運米七千二百石改兌米七萬九千一百五十石合無於內量撥支運米一萬二千石每石徵脚價銀二錢五分其六萬七千一百五十石准徵折色每石連席耗銀六錢伏乞 聖裁

一揚州府申稱原額正兌米六萬石內奉例截留軍餉本色米二萬石外四萬石合無於內量撥支運米七千二百四十三石六斗二升每石徵脚價銀二錢五分其三萬二千七百五十六石三斗八升仍徵本色改兌米三萬七千石亦乞於內量撥支運米二千七百五十六石三斗八

升亦每石徵腳價銀二錢五分連前兌改共支
運米一萬石坐派被倭殘害及災重地方其三
萬四千二百四十三石六斗二升准徵折色每
石連席耗銀六錢伏乞 聖裁

一鳳陽府申稱原額正兌米三萬石俱徵本色改
兌米三萬三百石合無於內量撥支運米一萬
石每石徵腳價銀二錢五分其二萬三百石准
徵折色每石連席耗銀六錢伏乞 聖裁

一廬州府申稱原無改兌止有正兌米一萬石合
無於內量徵本色米五千石折色米五千石每

石連席耗銀七錢伏乞 聖裁

一徐州申稱原額正兌米三萬石俱徵本色改兌米一萬八千石合無於內量撥支運米八千石每石徵腳價銀二錢五分共一萬石准徵折色每石連席耗銀六錢伏乞 聖裁

該戶部議覆恭候 命下本部移咨巡撫都御史鄭將揚州府所屬通州海門如臯三州縣倭寇擾害地方人戶再行覈勘明實合無查照近題蘇松事例量准將漕糧改折三分之一正兌每石折銀七錢改兌六錢其餘州縣并廬鳳淮徐四府州漕糧仍照先

奉 欽依事理均派所屬災輕及無災州縣里分人
戶趁時交兌施行庶民困少舒而 國用亦賴以不
匱矣緣係亟處兵荒極重地方以安人心以消內患
及奉

聖旨戶部知道等因具題

挑濬河道疏

題爲挑濬河道以濟新運事照得淮安地方自夏徂
秋黃河水發渾流灌入裏河水去沙存致將新莊閘
迤南一帶河道率多淤淺恐妨新運劄行管理南河
工部郎中包應麟踏勘去後續據本官督據淮安府

管河通判党淳勘得西門外起至新莊閘河口止量
長六千八百八十七丈照依上年規則俱以下深八
尺其龐家灣尤深九尺折筭共該三百六十八工共
夫五萬一千五百二十名四次翻工每次該夫一萬
二千八百八十名并官老廩糧工食共銀一萬三千
一十七兩四次通共銀五萬二千六十八石其人夫
衆多議照嘉靖十六年挑河事例起派本府牙行并
四府三州人夫赴淮攢挑等因到臣看得議呈相應
准擬但今錢糧缺乏夫力艱難姑先將近口淤淺太
甚者赴今挑濬夫用淮人如上年例餘再量減議報

批行該府續據回申爲照運期限迫工程甚大在庫
堪動官銀止有三萬五百八十餘兩而三里溝閘又
見在興工錢糧無從措置各府州寫遠又值災傷疫
病人夫未必能濟必須相時處分庶幾事機不失查
得今春亦因運事急迫自馬家嘴起至新莊閘四次
節挑深濶丈尺權宜略減亦已濟運似應悉照此規
再加深濶重運無阻而錢糧人夫減半矣又行通融
磨筭各深長不等俱挑口開濶十丈底濶七丈折作
二百五十二工每工人夫一百名共夫二萬五千二
百名仍作四次翻工以舒民力先自新莊閘起至福

興利止一次計該六十三工共夫六千三百名計二十五日完工每名日給銀四分共銀六十三百兩每工老人一名共老人六十三名行山陽縣選差殷實得過之人其積年棍徒幹充盡行革除每名日給銀三分共銀四十七兩二錢五分每三工用管工官一員行淮大二衛於千百戶選取每十二工用督工官一員於本府所屬有司內取用并築壩車水雜差官二員共二十八員每員日給廩食銀六分其前項夫銀必須選委廉幹有司官一員預先赴府領銀鑒鑿包封每五日一次沿工唱散但逃一日即扣在官事

完造冊繳報本員每日廩食銀六分共銀一兩五錢
通共銀四十三兩五錢總理官二員照依先議定委
文職通判党淳武職把總潘準每員日用廩給銀一
錢共銀五兩計一次通共銀一千三百九十五兩七
錢五分第以福興閘下至清江浦月河口止爲二次
明年正月初旬再行二次翻挑四次總共銀二萬五
千五百八十三兩合於本府庫貯修濬黃河等銀三
萬五百八十二兩四錢內照數動支再照人夫合行
山陽縣掌印官速將牙行清審編單至於衛縣里伍
人夫亦應量起山陽縣攢夫一千六百名大河衛八

百名淮安衛六百名共夫三千名俱縣衛掌印官選
取壯丁不許將老幼搪塞餘用前項行夫補足等因
到臣據此會同提督漕運鎮守淮安地方總兵官鎮
遠侯顧 議照新莊閘一帶河道乃漕運要路近年
節被黃河泛漲年復一年隨淤隨濬隨淤勞民
費財更無休息查得去冬今春挑濬馬家背等四處
工程計用銀一萬二千五百六十餘兩况今歲黃水
較昔特甚灌入裏河直至黃鋪一百餘里水勢稍緩
沙泥停積舊工徒費新役復興即今回空糧船不能
陸地行舟率皆車壩年久舊船破損益多所據應挑

工程既經管河郎中勘報該府覆勘前來相應依擬
欲候奏請至日興工但事在緊急新運期迫勢不
容緩除行該府作速起倩人夫擇日興工及行管河
郎中包應麟往來督理勒限完報以濟新運候事完
之日將挑過河工用過錢糧各數目造冊奏繳嘉
靖三十三年十一月十六日進奉聖旨工部知道
欽此

剿滅江北倭寇查勘功罪并乞預為防禦疏
題為剿滅江北倭寇查勘功罪并乞預為防禦事據
直隸揚州府申准通判史朝賓牒為剿滅倭寇事該

臣劄付備仰即查倭寇的於何月日時入境始自何處地方登岸流劫彼時原設守備倭官軍及該管有司巡捕巡江巡司官兵人等因何不行併力堵截致令猖獗爲害備查各官兵職役員名分別情罪輕重要見某日經過某處某日攻圍某處殺死軍民竈戶若干燒燬官民房屋若干陣亡陣傷官軍若干并陸續各官報到斬獲首級逐起審驗分別劇從真僞有無妄殺冒功并各官兵竈互稱搶奪首級等情從實查報等因又奉臣劄付仰將查過呂四等場自八月十五日起至九月初十日止豐利等場自九月十

三日至本月二十日止陸續斬獲各起倭寇首級及
地方功罪人員一併查明呈來以憑具奏施行備
行到職遵依親詣各該地方查勘得嘉靖三十三年
八月十五日巳時有倭船一隻約有八十餘賊自江
南來至呂四場地方二漾口燒船登岸從竹家莊流
住本場西北中團張方泚地方竈戶周顯家占住十
六日有海門縣署印高郵州判官趙卿即委巡捕典
史余廷舜張港巡檢王世臣吳陵巡檢趙仲爵會同
呂四場把截百戶伯永福該場大使朱汲副使李政
義官盧漢大河口備倭千戶常潮各領民兵竈勇人

等與賊對敵被傷親兵王伸等三名竈勇顧松等三名止獲倭弓一張箭三十七枝十七日各賊放火燒燬竈戶朱伯等三家草房一十四間殺死竈戶高橋等六名本夜各賊到於餘東場便倉西殺死竈民張瓘等二名北有分守通泰叅將梅希孔患病不能出軍各場司官吏備文稟報海防道兵備張副使即日親詣泰州行令本州知州趙祖朝如臯縣知縣陳雍揀選驍勇史湖葛蘭等二百餘名前赴通州會合剿捕十八日卯時各賊在於正場搶商鹽贛船二隻從運鹽河使向西行伯永福統領官兵追至曹嚴窪地

方對敵得獲倭箭一十二枝火筒一箇十九日各寇
流至餘東便場地方梅叅將調掘港場把截宿州衛
鎮撫呂圻通州所千戶顧萬元會同百戶伯永福并
通州巡捕判官施燿協力堵截有施判官家兵施傑
耆民江鉏等與賊交鋒斬獲首級一顆各賊退入竈
戶袁祿家至夜逃往海門舊縣經過殺死僧人卞元
登并居民孫鳳等五名二十一日到於地名新港居
民李軻家屯住殺死本家李富二十六日判官趙卿
帶家丁趙士太督同典史余廷舜張港巡檢王世臣
兵勇王秀成忻等用草圍焚李軻家草房一十間各

賊急擁出被衆兵截死三人俱被賊搶擄燒化箭
傷倭寇一十餘人本日各賊奔往地名李家莊比有
鎮撫呂圻宿州義勇官李金等督兵在彼對敵被李
金下民兵李倫同親兵王受斬獲首級一顆戮傷倭
賊二十餘人陣亡民兵徐漢等三名二十七日夜各
寇復到新港官兵截殺被餘西場竈勇曹大化斬獲
首級二顆海門縣陣亡民兵王山各賊當住迤東唐
竈岡居民楊梯家殺死本家男婦四名口燒燬房屋
一十七間二十八日典史余廷舜督兵陸梧等用鉛
銃打死倭寇五人各寇搶擄燒化民兵成忻曹思王

秀陸梧等斬獲首級一顆得獲腰刀一把裹頭紅絹一段陣亡民兵劉珊二十九日賊自新竈港移住居民郝員家屯住各路官兵會合追剿宿州民兵王舉等各用火砲打死倭寇二人各賊搶擄燒化比有西哨義勇官吳玄隊長張洗退縮不行拒敵以致各賊乘機衝殺民兵王豹等一十二名戳傷民兵趙仲良等八名搶去佛郎機三管此時判官趙卿下家丁趙士太兵勇王秀等與賊對敵共斬首級一顆得獲倭弓一張裹頭紅絹一段餘中場大使戰勇督同義官周民竈勇徐貴翟名唐奉嚴鼎周木陸禮王昺等共

斬倭首級三顆得獲倭弓一張箭一十枝刀與鎗篙
各二把被倭燒燬民查浩草房三間殺死本家婦人
一口三十日海門縣驍勇郁員等與倭對敵斬獲首
級一顆各賊燒燬郁員草房三間流往餘東場竈民
江鐸家屯住九月初五日呂四場義官盧漢竈勇潘
敬秦泮彭清等與倭對敵斬獲首級一顆截死倭寇
一名被賊搶擡燒化本日兵備張副使因見倭賊未
滅梅叅將稱病未出兵政無統乃領兵親至海門縣
調到儀真衛指揮劉瀛泰州所鎮撫王翺百戶劉芳
義官呂調陽通州吏目孫好仁各隨軍聽用當蒙查

得吳玄張洗先戰失事各以軍法捆打枷號示衆及
動支庫銀隨軍犒賞軍民竈勇莫不悅服咸有奮志
梅叅將前疾稍可亦到該縣計議征剿通州知州翟
澄書夜運送糧餉供軍不缺各賊屯住江鐸家本道
統兵直將賊巢圍困初六日呂四場竈勇朱蒼與賊
對敵被賊用銃打死初九日本道令官軍積草將江
鐸家房屋圍繞督令指揮劉瀛鎮撫呂圻王翺百戶
伯求福劉芳義勇教師王成李世德等及各場竈勇
通州海門如臯民兵人等用換牌火器當先四面伏
兵放火將江鐸瓦房一十三間盡行燒燬賊因勢急

衆擁齊出隨該本道督令精銳教師義勇王成李世
德向儒陸梧邵鑾葛蘭等八十餘兵奮勇當先砍殺
隨該叅將梅希孔部下親兵謝才王完等斬獲首級
二顆典史余廷舜督領民兵屈真馬照崔名蔡儒等
斬獲首級一顆得獲倭刀一把紅絹一段又同民兵
吳梯成忻陸惺斬獲首級一顆判官趙卿下家丁趙
士太同民兵王秀等斬獲首級一顆得獲倭刀一把
巡檢王世臣同兵竈崔泮等斬獲首級一顆得獲倭
刀二把巡檢趙仲爵同家丁趙鳳鳴弓兵王宣等斬
獲首級一顆判官施燿督領民兵季本等斬獲首級

一顆得獲標槍二根倭刀一把倭弓一張倭箭一十五枝黑馬一疋銀二兩三錢一分民兵曹繼祿與梅叅將部下民兵鄧堂合斬獲首級一顆呂四場大使朱汲等率兵夏京潘檄盧昺秦泮等斬獲首級三顆餘中場竈勇張相王安等斬獲首級一顆得獲倭弓一張箭三十三枝餘東場竈勇張瑞王价等斬獲首級二顆如阜縣驍勇葛蘭吳惠曹鑛等斬獲首級一顆各賊將民竈袁熙徐愛張儒等九家瓦草房五十一間盡行燒燬叅將梅希孔部下陣亡親兵韓祿等一十四名通州民兵陣亡李淵等一十四名比因天

晚各賊衝出行至塲東總催袁祿家屯宿初十日辰
時逃往竈戶江鋒家潛住各官追趕到彼將本家左
房九間周草圍迭燒燬各賊擁出衆兵截殺判官施
耀部下民兵江鐸江莊等斬獲首級七顆得獲竹柄
鐵刀一把倭刀二把典史余廷舜家丁余成民兵崔
炳王秀張通陸室等共斬獲首級四顆判官趙卿家
丁趙士太同民兵蔣良陸室陸梧周朋吳祿姚保崔
輝等共斬獲首級七顆巡檢王世臣同農民姜一元
弓兵王楠李良莊明莊桐張順周朋等共斬獲首級
六顆餘中塲大使戰勇督同竈勇嚴旺周保王祖曹

栗等共斬獲首級四顆得獲倭刀三把點鎗一根鎗四根餘東場大使張濟時副使李鳳督竈勇徐堯等二百餘名斬獲首級二十二顆得獲倭刀九把倭衣一件倭箭三十枝倭弓一張倭帽一頂標槍二根小倭甲一件丫篙一把鉛錫銃二箇紅段繫腰一條被傷竈勇徐堯等五十三名前賊盡行剿滅至本月十三日酉時又有倭船一隻自江南來至豐利場地名沙魚港西岸住泊止有二十餘賊登岸餘賊不知人數藏遁在船虜去竈戶陳相等二名十四日豐利場副使楊虎督領竈勇人等前去追剿各賊回船開

洋停泊十五日馬塘場大使姚大鵬督兵防禦各賊
棄船上岸流往地名川沙窪搶得石港場竈戶并
不知姓名人家共船二隻開洋本日酉時到於拼茶
場伍竈地方倭寇二十餘人上岸劫竈戶宮邵家衣
糧物件搶去竈戶吳龍徐鎧家船二隻有備倭千戶
張祚督兵至康莊地方因天晚未曾交戰十六日各
賊棄船登岸將虜去陳相并呂四場寄任人楊尊殺
死有拼茶場攢典倪堂督率竈勇與賊對敵陣亡竈
戶朱漢等三名有該場竈勇徐果王鎧楊臣等四十
餘人併力向前斬獲首級一十顆得獲刀八把弓一

張賊船當被我兵放火燒燬賊因勢敗無船可投奔
往角斜場搶竈戶包鑾袁福船二隻開洋復往拼茶
場伍竈地方十八日酉時賊寇駕船至豐利場灣港
住泊該場副使楊虎督領竈勇人等到彼至十九日
午時與賊交戰楊虎同男楊子進驍勇許昂吳弘陳
章桑析吳欽耿相丁鍾保正錢才等併力斬獲首級
八顆得獲弓二張刀四把箭五枝陣亡驍勇許翥桑
本王錦管春餘賊亦被各竈戳傷奔走上船二十日
備倭指揮王表統領千百戶潘忠盛勲并軍兵人等
至豐利場地名唐家直墩埃沙潢港口與賊交鋒當

被軍餘蕭艾熊經揚平等五十二名共斬獲首級四
顆得獲倭刀五把餘賊敗走二十一日有倭賊一十
餘人到於掘港場地名句鹽港口北岸該場大使靳
瀛副使任九疇帶領驍勇人等與賊交鋒當被驍勇
李信等斬獲首級一顆得獲大小刀二把二十二日
餘倭五人仍到豐利場沙魚港東岸有該場副使楊
虎率領驍勇陳悌等於二十三日辰時斬獲首級一
顆得獲弓一張箭四枝餘寇奔走海洋去訖二十九
日辰時楊虎仍率驍勇陳相等在於甜水港東瞭見
一倭用箭射死斬獲首級一顆十月初三日又有倭

船一隻從江南來至餘西場北海地方住泊倭賊二十餘人登岸將該場哨船水手陳霜等衣服米糧篷桅虜搬上船有近海義官陳科總催陳租等前至沙塗地方與賊對敵斬獲首級四顆得獲花布旗一面草帽二頂竹箭四枝馬杖二把鎗篙二枝各賊勢敗奔船開洋去訖本職通查過呂四等場自八月十五日起至九月初十日止除叅將梅希孔部下親兵王完等斬獲首級二顆未送紀驗外止據各該兵勇臨陣斬獲見在首級七十五顆內該本職督同江都縣主簿楊長春驗過真倭二十二顆從倭四十三顆豐

利等塲自九月十三日起至本月二十日止各該兵
勇臨陣斬獲首級二十二顆驗過真倭一十一顆從
賊一十一顆又自九月二十一起至十月初三日
止各該兵勇斬獲首級七顆內驗過真倭四顆從賊
三顆前後通共首級一百四顆內真倭共四十七顆
從倭五十七顆細加查訪委係真正功次並無妄殺
冒功等情此皆本院委任責成調度得宜海防兵備
張副使親臨行陣振作士氣是以賊寇望風而勢自
潰軍竈同力而功自成又查得先該本府知府吳桂
芳奉本院牌仰動支官銀一千五百兩行委運司判

官馬倫召募公塲竈勇在塲防禦仍預發銀兩在通州如臯等處供給民兵以致寇至兵不遠調而精銳自足費不及民而供應以時則今次成功亦賴區畫素豫有以爲之所矣緣此次剿倭甚速且盡是以各該地方官員獲功頗多失事亦鮮及據前項首級係各塲竈勇與通州海門民兵斬獲爲多各該官兵有不得者積慙懷忿遂稱搶奪實難憑信止查通州民兵曹繼祿與梅叅將部下民兵鄧堂合斬首級一顆彼時曹繼祿自行報功被鄧堂具告兵備張副使處批行通州處分明白其本府并高郵州各起捉獲倭

寇三名審明另報外將查勘緣由備牒到府申報到
臣據此案照先於本年九月十二日爲地方倭寇登
劫事本月十五日爲仰仗 天威剿滅江北倭寇事
十月十一日爲仰仗 天威剿平江北倭寇斬獲首
級事俱該臣具 題訖及劄行通判史朝賓紀驗功
次前往被賊地方查勘有功有罪緣由去後今據前
因俱從實開報不敢纖毫隱匿其給賞有功員役優
恤陣亡壯勇量賑燒燬房屋醫治被傷軍民悉遵照
節奉 欽依劄行揚州府知府吳桂芳次第舉行外
照得倭寇類多姦細詞知江北兵船調往江南遂敢

乘虛累犯江北即今仰仗 天威先後剿絕驅逐地

方稍寧臣住劄淮安專委海防兵備副使張景賢會

同叅將梅希孔督兵剿捕所據勘到功罪俱已明白

相應擬議具報爲照副使張景賢志慮忠純才猷宣

朗三令五申而賞罰甚明一月三捷而俘馘殆盡足

徵經文緯武之器具見安內攘外之功所宜加賞陞

俸久任責成者也揚州府知府吳桂芳建議調募土

兵先期給發兵餉綜理周密而神思安閒冰蘖自將

而出納無吝所宜給賞者也通州知州程澄泰州知

州趙祖朝如臯縣知縣陳雍海門縣署印高郵州判

官趙卿皆能訓練兵卒而遇警足以即戎餽運芻糧而臨時不至缺乏儀真衛指揮劉瀛宿州衛鎮撫呂圻百戶伯末福泰州所鎮撫王翺百戶劉芳通州判官施耀海門縣典史余廷舜張港巡檢王世臣吳陵巡檢趙仲爵呂四場大使朱汲餘中場大使戰勇餘東場大使張濟時副使李鳳皆能部領兵竈而聽授方略躡蹤追襲而協力剿捕揚州衛指揮王表千戶潘忠百戶盛勳豐利場副使楊虎掘港場大使靳瀛副使任九疇雖所斬獲不係大夥之寇然於村墟均有捍衛之勞以上各官所宜量賞者也及照各該地

方官員獲功頗多失事亦鮮况江北自千戶姜旦兵船三十隻驍勇水手曹鼎等五百名調赴江南之後水兵既乏哨探陸兵遂難禦防似應免究以責後效再照江北江南相去不遠通州與常熟縣相對三十里海門縣與崇明縣相對十八里即今常熟節經寇難崇明已被殘破而倭寇見今糾聚吳淞江口及八團四圍者不下數千皆陸地置造房屋千數間水中聯絡舟船千數隻是皆數年積集之寇難責一時平定之功若八團賊乘風至江北呂四場不過一日四圍賊不過半日而江北兵船久住江南地方空虛殊

為可慮況使船難於使馬而舟師之練習其艱主兵
便於客兵而烏合之徒衆易散今賊徒水陸盤結有
備而我兵南北調遣乏人切恐姦謀叵測今冬未得
解散明春益復猖獗豈惟通泰海門如皋四州縣危
急萬一賊渡海而北則呂四等場皆有小徑可以越
通泰而直趨揚州邇江而西則狼山等處皆是長江
可以犯瓜儀而窺同 留甸如此則漕運阻絕江淮
震動矣臣待罪海防兼理漕務日夕憂惶計無所出
若專顧江南不顧江北即使江南安靖而江北驛騷
憂方深也即今賊少船寡尚可支持倘船多賊衆何

以待之如蒙乞 勅兵部再加詳議上 請行令總
督軍務尚書兼右都御史張 將姜旦水軍即便發
回江北休息一二月以待明春賊至遠於哨探防禦
仍於明春正二月間再發健將精兵二千員名前來
江北瓜儀駐劄以防備漕運拱護 南京庶保無虞
地方幸甚臣不勝幸甚除移咨總督軍務衙門外嘉
靖三十三年十一月十六日進奉 聖旨兵部知道
欽此該兵部議擬為照倭寇狡獪難測乘風隨處剽
掠委宜有備庶保無虞但江南原調江北兵船已經
議行總督張 查照賊勢酌量議處漕運河道又經

募撥兵船行令署都督周于德管領防護副使張景
賢奉 旨加陞俱難再議所據前項各該官員剿滅
倭寇之功既該都御史鄭 具題前來相應議擬合

候 命下移咨巡撫衙門將吳桂芳翟澄趙祖朝陳
雍趙卿劉瀛呂圻伯永福王翺劉芳施耀余廷舜王
世臣趙仲爵朱汲戰勇張濟時李鳳王表潘忠盛勲
楊虎靳瀛任九疇動支無碍官銀分別獎賞仍咨總
督都御史張 查照節奉 欽依內事理議處停當
務使江南江北俱有備禦勿得顧彼失此致有疎虞
等因嘉靖三十四年正月二十七日太子太保本部

尚書聶等具題本月二十九日奉聖旨是欽此

鄭端簡公奏議卷之七

門人項篤壽校梓

淮陽類

謝 賜銀幣疏

奏為恭謝 天恩事嘉靖三十三年十月十五日接
得九月二十六日邸報內開兵部一本為剿逐倭寇
查勘功罪事該臣題該本部議擬覆題節該奉 欽
依賞臣銀幣臣不勝感戴除恭候 欽賜銀幣齎捧
至日望 闕叩頭外臣竊伏念簡書 上報方懷
震疊之威 綸綍下臨俄霑 露渥之澤 禹貢之

金三品既受錫於師中 虞廷之服五章復承筐於
閭外矧茲 匪頒之賚爰及同事之臣仰荷 寵光
俯增愧懼伏惟 皇上 欽明睿哲 齊聖廣淵
秉禮樂征伐之權 成中和位育之治雖賞不僭而
刑不濫寧功惟重而罪惟輕至如臣者跡若繫於淮
陽心每懸於 禁闥偶緣鼠竊苟活鯨波旋至鴟張
敢窺雉堞幸驅逐於江渚竟殲獲於海隅寔藉 天
威匪由人力顧惟封疆之未靖益知牧圉之彌艱徒
爾 登嘉何以報稱庶幾蚤爲將來之計或可少追
既往之愆臣敢不磨鈍自將矢初心於百練鵜梁是

戒甘退食於五紵懋揚 干羽之風期致梯航之化
伏願 堯仁天則垂拱衣裳 周道日昌坐分寶王
鹽田穀土共輸九府之財楚縞吳織畢獻三縑之幣
信乎 一人之有慶 內順治而外威嚴允矣四方
之無虞 後武功而先文德臣無任惶悚感激欣戴
之至嘉靖三十三年十一月十六日進奉 聖旨覽
奏謝知道了禮部知道欽此

建三里溝閘疏

題爲運河淤塞乞 賜亟處以通糧運事查嘉靖
三十年八月內准工部咨該前任漕運都御史應

題前事內開清河口爲因黃河泛濫淤阻重運不得
通行議於二里溝開河以便糧運擬於適中之地建
置閘座以時啓閉等因本部議擬題奉 欽依備咨
前來已經劄行淮安府動支原議官銀採辦石塊木
料造閘去後節因水勢占漫未得舉行該臣接管先
於三月初八日親詣看得前項三里溝開河建閘寔
與新莊閘一帶河道利害相因切緣新莊閘口正當
徐沛黃河下流連年河水泛漲灌入裏河河水稍平
淤沙頓積以致年復一年隨淤隨濬隨淤勞民
費財不得休息若三里溝開河建閘上接泗水清流

下避黃河渾水新莊閘便可隨宜啓閉縱有漲之時必無淤沙之患可節民力可省官銀爲利甚大此寔前任都御史應 畱心漕務相度地勢水勢特建此議委於運道有補既經該部覆議仰荷 聖明俯賜施行地方幸甚但合川石塊產於徐州尚多未完臣一面委該州判官高瀛等催督各匠晝夜採取運至河邊一面委淮安府知事吳寬齋領官銀前去該州公同掌印官雇覓民船裝運工所交卸去後隨行管理甯河工部郎中包應麟復勘相同臣於九月十一日督同通判党淳等又詣三里溝再三詳議牌行

淮安府舊得南河包郎中原同党通判等定擬建立頭閘二閘俱各相應無容別議但昔人嘗謂溝必因水勢防必因地勢所據建閘築隄亦應並議即今二閘至頭閘泗濱一帶地勢卑窪恐河淮汶泗諸水或時漲泛向東奔潰既建閘以引清流必須築隄以遏渾水即今未開河身三十七工之上足勾築隄成閘建委於運道有益不必年年挑河勞費財力然兩閘臺基宜高峻以壯地勢鴈翅宜廣濶以逆水勢斯為可久之計其東南七里等湖尤恐水滂漉漫流入三里溝新河亦為可慮似應東邊亦築一隄然一時

并工不惟人力不前抑且取土有限或候閘完通運
相度緩急次第舉行亦未爲晚等因并行通判党淳
督理及咨總理河道衙門并行撫屬各府州選取作
頭石匠陸續前來臣會同提督漕運鎮守淮安地方
總兵官鎮遠侯顧 議照前項閘座合用物料接續
運到相應舉行擇於十月二十八日祭告興工及行
管河郎中包應麟總理勒限完報除候事完之日將
造過閘座用過錢糧數目造冊 奏繳嘉靖三十三
年十一月十六日進奉 聖旨工部知道欽此

預徵馬疋折銀䟽

題為乞憐地方旱災懇乞轉達分豁稅糧馬疋以蘇
民困事據直隸廬州府申據所屬六安州并合肥英
山巢縣各申據里老劉興等連名呈稱地方亢旱五
穀不收錢糧馬草無從措辦小民憂惶日不聊生及
據無為舒城廬江霍山四州縣各申稱地方春間雨
澤稍通未敢申災不意秋旱收成失望等因各申到
府除委官踏勘各屬災傷分數另案具申轉達奏
請蠲免稅糧請給賑濟外查得本府八屬除英山一
縣原無免糧田地不養種馬外無為合肥等七州縣
原額種兒騾馬四千三百七十四疋每年奉兵部勘

合行令太僕寺分派本府起俵備用大馬八百七十
六疋本色七百一十九疋買馬解俵折色一百五十
七疋收銀類解本府遵照於前種馬內輪僉椿頭派
行所屬徵買俵納歷年遵行竊照府屬地方原不產
高大馬疋每遇解俵俱椿頭人等攢價二三十兩分
頭求買中途之倒死驗收之艱難小民累至傾產蕩
家顛殞道路地方受累莫甚於此况值非常災旱日
食尚恐不敷馬疋何由措買各屬所申誠不得已卷
查嘉靖二十三年間本府災荒該巡撫衙門具題
兵部議擬題奉 欽依備行本府將派到嘉靖二十

四年分折色馬疋每疋徵銀一十八兩本色馬疋令
暫改折色一年又查得本府庫貯歷年各屬解到牧
馬草場租銀共一萬六百八十一兩有零聽候買馬
支解今照預徵嘉靖三十五年分坐派備用大馬在
邇若復照常派徵本色委的民窮財盡難以買解不
無上誤軍需下激民變如蒙憫念地方今歲旱災重
大而六安合肥巢三州縣顆粒無收尤爲十分困苦
合無早爲題請不爲常例將六安合肥巢三州縣
該年本折色馬疋姑免派徵就將前項草場租銀查
照各州縣額徵折色馬價數目動支抵作三州縣備

用馬價解京交納其無爲舒城廬江霍山四州縣准
照嘉靖二十四年則例暫改折色一二年等因具申
到臣隨批近日邊報甚急馬價折色及用地租銀抵
馬價似於時勢難便依擬仰府呈南京太僕寺施行
續據該府回申備呈南京太僕寺照詳蒙批據呈具
見權宜恤民之意但各州縣草場租銀嘉靖三十年
部題 准盡數解部此係近例擅難改議動支抵作
馬價况原出於本寺具 奏其暫改折色節年俱係
巡撫衙門具 題徑自申呈奏 請施行蒙此爲照
馬政係干邊務豈宜輕易改折但本府所屬旱災重

大誠所謂野無青草室如懸磬者固本寧邦似應破
越常格以聯繫人心合無查照二十四年則例題

請准將所屬州縣本色馬足暫改折色一二年徵價
解京後不爲例庶災民賴以全生地方可保無虞等
因復申前來又據淮安府申據山陽縣申據里老王
平等告稱嘉靖三十年以來淮河變遷洪水淹沒城
郭鄉村俱被流徙民困已極今年河復故道水不漫
淹方各揭債佈種不意夏麥遭雨不收秋禾復被亢
旱盡皆枯槁即今斗米值銀一錢夏秋稅糧未蒙蠲
免挑河築壩歲無休息三十四年預徵馬價鬻男變

產措置方完切恐三十五年該辦本色解京但非產馬之地往年起解止是徵銀別處求買其勞費解俵苦不可言况本縣久被災荒百姓豈能堪此重累告乞轉達仍徵折色庶得公私兩全又據海邳清河宿遷桃源睢寧安東沐陽贛榆鹽城等州縣各亦申稱預徵馬足俱因災荒無從徵解等因各申到府卷查所屬海邳二州山陽等九縣每年預該解京備用本色馬六百八疋折色馬五百八十九疋嘉靖二十三年間地方災傷該巡撫衙門具題兵部覆議欽准將嘉靖二十四年分本府備用本色馬每疋徵銀

二十兩嘉靖二十九年間本府陞任知府趙大綱奏
將嘉靖三十年三十一年三十二年分清河桃源宿
遷贛榆四縣馬疋照前徵價俱解訖嘉靖三十年間
該巡按江西監察御史孫慎題將三十二年分本府
各州縣馬每疋徵銀二十四兩嘉靖三十二年間該
巡按直隸監察御史郭民敬題將海邳二州清河桃
源宿遷贛榆睢寧等五縣及本府陞任知府張敦仁
奏將山陽沐陽鹽城等三縣預徵三十三年各馬疋
俱改折價嘉靖三十三年又該御史郭民敬題將嘉
靖三十四年分馬疋亦俱折銀除遵行外爲照本府

地當南北衝要漕運咽喉連年既遭水淹又復亢旱
夏秋田禾俱已不收况復倭奴警報未寧河道工興
在即不獨山陽一縣爲然至於安東清河桃源宿遷
邳州俱係臨河地方水旱相仍素稱凋敝海州贛榆
密近海濱地土鹵薄雖寧沐陽僻居曠野屢報災傷
鹽城田產頗饒近值倭情與通泰相爲唇齒人心洶
洶急宜撫恤若蒙派徵本色委的所屬既非產馬之
地况解俵往返盤費尤難合無查照節年題 准事
例折銀解納庶幾 國用不失民困少蘇等因各到
臣據此查嘉靖三十一年十二月初一日准兵部

咨爲議處預徵買解馬足以蘇民困以修政本事該
巡按直隸監察御史徐紳題該本部議擬合候 命
下本部將三十二年該預徵三十三年備用馬足割
行太僕寺准照本官所議預徵三分之二減免一分
候派馬之日備開明白呈部再行題 請施行至三
十三年三十四年各照前徵派三分之二三十五年
仍依原額全徵本折分數悉照舊規徵解銀買馬足
即行停止等因題奉 欽依備咨前來已經通行欽
遵去後今據前因切惟馬足關係邊方重務使地方
出產則百姓雖疲自當竭力供用今廬州府所屬地

方僻居山谷而淮安府所屬州縣又係臨河濱海地
勢卑濕素非產馬處所每年派到備用馬疋止徵價
銀責令椿頭前往別處收買解俵水草不服中途多
致倒死或到京看驗不中復又退回小民負累疾苦
萬狀即今地方旱災赤地千里人不聊生各府所申
相應酌處臣查得嘉靖二十三年間爲蠲地方旱災
該前任都御史王暉具題兵部覆議荷蒙聖恩
准將嘉靖二十四年分各府州縣備用本色馬疋照
例折銀解納於是民困得以稍蘇今既比例申請查
與事體相同况非當年正額皆是先期預徵即使屢

豐之歲民情已自憂惶值此積災之後有司委難督迫較之二十四年相應尤加矜憫如蒙伏望皇上軫念民艱乞勅該部從長計議合無查照先年災荒折徵馬價事例將廬州淮安二府嘉靖三十五年分預徵本色備用馬疋暫准折色一二年徵銀解納後不爲例及照鳳揚二府徐滁和三州俱係災傷重大地方各有預徵本色馬疋一時申報未至再乞聖恩俯賜垂憫一併折徵如此不惟民困得蘇抑且原額不失嘉靖三十三年十一月十六日進奉聖旨該部知道欽此該兵部議覆看得總督漕運兼巡

撫鳳陽等處地方兵部右侍郎鄭 題稱廬州淮安

二府地方災荒乞要將嘉靖三十五年分預徵本色馬足暫准折色一二年徵銀解納及將鳳揚二府徐滁和三州本色馬足一併折徵一節爲照連年以來南北養馬地方俱被災傷小民變的困苦本官職專撫循目擊其苦題 請前因無非恤民至意但今邊方多事用馬不貲總計明年預徵及寄養堪兌各馬足不及二萬已不穀防秋兌用若又將南直隸應徵本色馬二千四百五十足盡改折色則馬益不敷臨期缺乏將何所措處蓋改折馬足以蘇民困固一時

權宜之計而軍國之需干係甚重尤不可不慮也如以災傷之餘百姓負累必不得已少加寬恤亦止可將重災州縣馬疋量為改折俾受一分之賜但各地方災傷輕重本部難以遙斷若行彼處勘報不無遲延誤事相應酌處合候命下本部劄付南京太僕寺及咨行巡撫衙門將南直隸江北養馬州縣三十四年預徵三十五年本色馬二千四百五十疋以三分為率准改折色一分該改折馬八百一十六疋查勘被災極重地方酌量分派每疋照例徵銀二十四兩姑准一年至三十五年照舊派徵其輕災州縣

馬疋仍依原派分數徵解不許改折南京太僕寺官
會同巡撫衙門一面查照新准改折馬疋總數分派
催徵一面將改派過重災州縣各馬數徑自題知
庶幾調停適宜官民兩便等因嘉靖三十三年十二
月二十六日太子太保兵部尚書聶等具題本月
二十八日奉 聖旨是欽此

保留知府雷達給由疏

題爲保留給由官員事據直隸廬州府申准本府知
府雷達關稱見年三十六歲江西豐城縣人由進士
嘉靖二十一年二月除授直隸太平府推官二十四

年四月陞兵部車駕清吏司主事二十九年三月陞本部武選清吏司員外郎本年十月陞本司郎中三十年十月陞授今職本年十二月十三日到任扣至三十三年十一月十二日止連閏歷俸三年例應給由合關本府轉達施行等因准此查得本官三年任內並無黏帶不了事件并經手一應未完及移易係官錢糧亦無公私過名等項違碍合無照例起送給由等因到臣據此看得本官才識秀朗操持勤慎安輯流竄抱鴻鴈之憂解散逋逃著崔蒲之績歷任三年例應初考賢勞已著似難復留但地方多事不可

缺官臣會同巡按直隸監察御史劉世魁議照即今
饑饉方殷師旅未息山箐江洋防禦爲難催科賑貸
撫字尤急本官旣久爲士民嚮附又屢經撫按薦舉
况係正官時不可缺相應保留如蒙伏望 皇上勅
下該部查議合無 俯從臣請行令知府雷達照舊
支俸管事仍將任內行過事績攢造牌冊差人送部
查照如此庶幾官守得人而緩急有濟矣嘉靖三十
三年十一月十六日進奉 聖旨該部知道欽此該
吏部咨看得知府雷達歷俸三年例應給由但旣該
總督衙門奏稱地方饑饉方殷師旅未息正官時不

可缺乏要保留在任管事相應酌處咨行知府雷達
暫留在任支俸管事待地方年豐事寧之日仍照例
給由赴部施行

申明三湖禁例疏

題爲申明三湖積水禁例以備接濟漕渠事嘉靖三
十三年十一月初五日准總理河道工部右侍郎兼
都察院右僉都御史曾 咨准臣會藁爲陳愚見以
利民生以濟河渠事議題昭陽湖櫃外餘田召民佃
種等因准此案照前事已經通行山東布按二司并
南北管河管泉分司及徐州曹濮等兵備道各督率

所屬府州縣管河管泉等官勘議昭陽南旺安山馬
場等湖堪修水櫃有何實用未報又該本院親臨督
同各該管河等官踏勘得馬場南旺安山等湖見有
修蓄水櫃堪濟運道其內外高阜地畝雖堪給佃第
恐漸次侵種低窪地畝未免盜決隄防以故衆議未
定姑候再勘外惟昭陽湖水櫃近年黃水淹淤地勢
高阜間有低窪之處亦不能受泉源並無勺水一望
荒蕪地土悉皆閒曠爲照各官議將本湖內湖低處
仍存畱以見舊制其外湖高阜之地計畝召民佃種
歲納租銀約有一千七百餘兩收貯官庫以備河道

支用度其事勢尤爲官民兩便已經行令管理沽頭
間主事魯鎰具由另報去後續據本官呈稱昭陽湖
櫃外餘地五百七十二頃二十八畝六分一厘率皆
高阜抑且茫無限隔蓄水委難濟漕無賴俱屬久荒
要歸先年失業之民佃種照畝加徵租銀緣由前來
但恐議有別見事當歸一已將前項緣由於嘉靖三
十二年十二月十二日移咨總督漕運兼巡撫鳳陽
等處地方兵部左侍郎兼都察院右副都御史吳
處查照計處施行外隨准本官咨稱爲照前項四處
水櫃先該本院奉 命賑濟之時經由各地目擊時

艱乃爲具 題雖出利民生濟漕渠之意今既該貴
院親臨踏勘知之必真但事在彼中本院難以計處
等因回復到院案候通勘至日會 題間今唯前因
爲此合咨前去查照施行等因准此卷查先准工部
咨該刑部左侍郎吳 題前事備咨前來已行徐州
兵備道勘議該臣接管續據兵備副使劉天授呈稱
南旺馬場安山三湖該山東委官徑自勘報其昭陽
湖餘閒田地內滕縣地七十二頃三十六畝外沛縣
餘地共計四百九十九頃九十二畝六分一厘已經
踏勘明白與水櫃不相妨礙棄置荒蕪誠爲可惜相

應召民佃種每畝徵銀三分聽候河道公用等因已
經會議於本年十月十一日具題去後今准前因
又該本官揭帖開稱昭陽湖地更無勾水真可與民
佃種惟安山南旺馬場三湖水高運河六七尺實賴
其接濟其勢豪見昭陽湖與民佃種必又有本奏
擾此各湖之地儻一與之後必有侵種決隄之患今
春末亢旱徐州小浮橋黃河水來甚微止靠徂來諸
泉以濟運道運河水淺量開馬場湖水接濟十日後
得雨運河大通安山南旺湖水尚如舊未開此湖水
深有益於運河也昭陽湖地則與三湖大有不同蓋

原因黃河水決衝壞飛雲橋時已將此湖盡爲平地
雖所謂水櫃者亦皆無用召民佃種似亦相應等因
到臣爲照安山南旺馬場昭陽四湖乃漕河水櫃查
得去歲該刑部左侍郎吳 奉 命前往山東直隸
賑濟經過地方目擊各湖櫃外田地荒蕪以此具
奏召人耕種納租該工部議擬題奉 欽依已行徐
州道將昭陽湖櫃外餘田勘明會 題外其安山南
旺馬場三湖見今有水濟運與昭陽湖事體大不相
同誠恐姦豪牟利之家矯借此例爲照 奏擾未便
所據前項三湖既經河道衙門咨勘各湖水勢地勢

應佃應存皆其身經目擊以故明白詳備况關係漕
河重務如蒙乞 勅該部查議合無轉行總理河道
都御史嚴督該省管河管泉兵備等官將安山等三
湖水櫃照舊蓄水以濟漕渠不許勢豪援比佃種及
盜決隄防敢有故違查照新例從重問遣及有妄比
昭陽分佃奏擾者即將原詞立案仍行究治如此庶
漕河水櫃不致廢壞而姦豪覬覦之心永絕矣嘉靖
三十三年十一月十六日進奉 聖旨該部知道欽
此該工部議覆臣等看得先年諸湖設爲水櫃所以
蓄水濟運有關 國儲無容別議臣前奉 命賑濟

淮徐兗沛地方經歷昭陽湖濱見湖坡沙漫淤爲平
阜而南旺安山等湖櫃外餘田頗多亦堪樹藝因有
例禁民不敢耕維時沿湖饑民失業千百爲群剽掠
官運船隻幾釀大患非我 皇上垂仁賑恤措斯民
於生養安全之地其捐竿負戈去而爲盜者又不知
有幾矣臣目擊民艱且事固有昔利而今否者欲將
櫃外餘田聽民佃種使其居有常業以存恒心非謂
盡廢水櫃而畀之民也今節該各官會勘得馬場南
旺安山三湖水櫃有利運河難以召佃惟昭陽湖淤
爲平地原與運河不相關涉與民佃種公私兩利相

應依擬合候 命下本部備咨漕運河道等衙門及
咨都察院轉行巡按御史并管河管閘等官嚴督該
省兵備州縣掌印等官即將昭陽湖櫃外餘田四百
九十九頃九十二畝六分一厘召民耕種自嘉靖三
十四年爲始每畝徵租銀三分完收貯庫以備河道
公用大率每戶以五十畝爲則不得多給以啓豪強
覬覦之端諸人得以藉口仍各給帖執照使地無遺
利民樂更生日後或於河渠有濟照舊退出還官公
私兩無妨礙其馬場南旺安山等三湖水櫃仍蓄水
以濟漕渠榜示遵守如有豪民盜決侵佃等項查照

先今事例施行等因嘉靖三十四年正月十八日本
部尚書吳 等具題本月二十日奉 聖旨是欽此

叅屯官侵欺倉糧疏

題為清查倉糧以免貽累事據整飭潁州兵備僉事
朱舜民呈該蒙臣批狀問得犯人徐紀招係直隸鳳
陽府潁州民有同城河南潁川衛原額屯糧夏稅小
麥二萬二千四百石秋糧粟米四千四百八十石該
衛舊規歲於五十百戶所納糧屯丁內僉定串頭分
派催收運赴本州廣積倉聽該衛管屯官公同收受
入厰放給官軍俸糧支用紀不合投入本倉掌管糧

數交結在官軍餘吳相等各不合故違打攬各場攬收屯糧已經問發充軍匿案在家向未事露嘉靖三十年分該衛額徵屯糧夏稅小麥在官散行管屯指揮僉事元渭督同本倉今監故大使劉學等徵收間有今告在官別卷問革本倉副使呂尚到任接管比元渭不合向紀說稱往年屯糧大家都要使用些等語紀得此言就向吳相等商說你我將糧攬收通同管屯官攢分用捏補虛數作為放支月糧通關止繳河南月報止申直隸兩無查對稽考等語各就依從分投強攬串頭杜槐等屯糧銀紀與吳相共將銀一

百兩送與元渭又不合故違其餘腹裏節差巡守等
官查盤去處若有監守盜糧八十石銀四十兩以上
問發邊衛求遠充軍事例將銀接受侵欺入已元渭
又不合私收串頭王臣等屯糧銀共三百五十二兩
四錢九分二釐八毫四絲三微五纖仍違前例侵欺
入已捏作完數元渭又不合徑自帖行本倉虛出通
關一本黏附衛卷二本轉繳河南管屯兵備道訖後
元渭改差京操本衛申委在官散行指揮僉事白鑾
接管嘉靖三十一年分額徵夏稅小麥徵收間紀等
各又不合仍違前例強攬串頭溫福等糧銀共三千

一百七十九兩三錢一分二釐九毫止將銀二千八百三十一兩俱同吳相并伊家人白琴交與白鑾亦不合故違前項監守盜糧八十石銀四十兩以上問發邊衛求遠充軍事例將銀不行解州侵欺入已在官書手劉仁見證餘下糧銀三百四十八兩三錢一分二釐九毫紀又不合侵欺入已白鑾慮恐查盤暗將會簿填寫虛數以備搪塞本年額徵秋糧亦該白鑾徵收後委官賴上縣羅知縣查得白鑾徵完串頭劉恕等銀七百五十三兩二錢六分四釐未解解州違例侵欺入已嘉靖三十二年六月內蒙巡按李御

史行委廬州府陳推官到州查盤紀等將會簿虛填糧數捏作放給大同春秋兩班官軍虛出通關底案一張在卷本月十三日呂尚慮恐貽累將情具呈本州白鑾思被呂尚呈發行勘要行擴飭於本年十一月十四日并嘉靖三十三年二等月十四等日三次共解過銀一千五百三十七兩九錢九分九釐七毫潁州貯庫外尚有銀一千二百九十三兩三毫白鑾仍侵入已今有呂尚又將前情具狀抱赴巡撫鄭都御史處告理隨批倉糧一粒皆係小民膏血據狀侵欺至二萬餘石該州官員何在呂尚等已批發落劉

學等虛出通關情弊仰潁州兵備道嚴究呈報干礙
該州掌印管糧官併叅呈奪該兵備朱僉事依蒙行
州提吊人卷解道逐一隔別覆加細審責令紀等與
元渭白鑾面對前情明白問擬徐紀等各應得罪名
照出指揮白鑾元渭各有罪叅呈到臣除將犯人徐
紀等批行追賊解遣爲照潁川衛隸河南潁州隸直
隸該衛每年額徵屯糧管屯官督同該州倉官攢收
受今招通關止繳河南月報止申直隸兩無稽考以
致問革直隸倉官呂尚告發該道問報查與該州事
無干涉除行州今後該衛徵收屯糧通關俱赴潁州

掛號登記其月報通關俱要一樣二本一繳河南一
繳直隸彼此均得覺察稽考庶錢糧不致侵漁州倉
不致貽累外叅照河南都司潁川衛指揮僉事白鑾
汧渭老姦巨猾同惡朋濟即今軍士困窮之日又值
錢糧缺乏之時乃敢收用屢犯軍斗通同積年攬頭
恣谿壑之欲惟事貪饕行鬼蜮之謀徒爲掩飾虛出
通關捏補領狀暗登會簿冒填底冊文卷被其彌縫
官司難於磨勘侵銀幾二千兩扣糧幾一萬石破產
抵賊未爲盡法奪官謫戍尚有餘辜律合有罪嘉靖
三十三年十一月十六日進奉 聖旨都察院知道

叅軍官索詐白糧船疏

題為河道事據整飭淮揚海防兵備副使張景賢呈
該蒙臣批狀問得犯人張愷招係直隸儀真衛中所
運軍嘉靖三十三年八月十三日本衛蒙戶部僨運
韓主事准監兌糞主事手本取官催僨白糧船隻本
衛將散拘在官本所副千戶王道呈送韓主事處蒙
差前往常州等處催僨太倉等五州縣淺阻船隻王
道只合照依牌限前進為當因見韓主事駐劄寫遠
就不合不行前進差愷與在官運軍魏現拘喚在官
聞夫魏琪等前來分付如遇白糧船到聞具手本投

報本月十五等日崑山縣糧長嚴廩等嘉定縣金封
等太倉州徐龔等華亭縣衛佑等各運糧船到閘魏
琪等將船數開遞王道差愷與魏現行拘愷等各不
合索得嚴廩等銀一兩六錢均分入已方帶見官比
王道要得乘機索財又不合妄稱嚴廩等遲誤糧運
將各拶打責令取供嚴廩等畏懼刑責只得各湊銀
布不等嚴廩等三十二兩金封等一十七兩三錢徐
龔等一十九兩二錢衛佑等二兩夾在官書手周室
胡希伍各亦不合引領送與王道接受伊又不合假
以問罪爲由科罰紙贖銀嚴廩等一十兩八錢五分

金封等一十二兩四錢徐龔等九兩五錢五分衛佑等一十兩四錢俱入已續蒙漕運鄭都御史訪得委官索騙白糧船隻銀錢給發告示仰儀真縣張掛禁約後有上海縣糧船到閘王道因見告示隨即放行訖本月十三日蒙龔主事查得王道承委催償不務清慎罰遭寇窮困之糧長違駕運免鞠之嚴例止當責催速過豈得逗遛任情耽誤 國儲例應叅問此律脾仰本衙即將本官嚴行戒諭行令痛革初心以圖後效具戒飭過緣由申呈撫按衙門知會後嚴厲等因被王道與愷等拶打索詐不甘將情各另狀赴

鄭都御史虔告准省令各告部糧去訖又該南京工部管閘程主事蒙鄭都御史行令密拘閘夫胡奉等到官審得前項索財情真備由叅呈回報併將嚴廩等告詞黏連批仰海防兵備道問報本道將愷等與王道行拘到官再三研審前情明白問擬張愷等各應得罪名照出干戶王道有罪叅呈到臣除將犯人張愷等批行發落外爲照今年漕運船隻已於六月內過淮盡絕至八月內王道方承委催餉不過白糧船隻又經臣先期差委山陽縣縣丞劉鮮渡江督催已到儀真各糧運頭先經倭寇焚劫又遭非常旱災

運至糧米皆農夫之骨髓舟人之汗血王道乃敢濫
刑贖貨法外指索通計贓銀至一百一十三兩七錢
情罪可惡叅照直隸儀真衛中千戶所副千戶王道
叨承武陟忝竊部委輒肆兇惡多收棍徒分投撲捉
非法拶打逼索銀錢強取罪贖數逾百金羈留旬日
紊亂漕規稽誤糧運律合有罪嘉靖三十三年十一
月十六日進奉 聖旨都察院知道

乞專官練兵拱護 陵寢及舊沿海春班官
軍疏

題爲懇乞 聖明專官練兵拱護 陵寢及舊沿海

春班官軍防禦倭寇事照得撫蜀地方表裏江淮襟
喉水陸齊魯梁宋境界相鄰山海鹽礦盜賊竊發去
歲逆賊師尚詔流劫宿州等處幸聞鳳泗陵寢高
墻該前巡撫都御史吳巡按御史李逢時會議奏
留皇陵衛春秋兩班官軍三千二百二十五員名
防守皇陵又該御史李逢時奏將泗州衛軍佐等
三所軍餘免其別差專一防守祖陵於是地方有
賴及照今歲節被倭寇侵犯通州等處仰仗天威
陸續剿逐地方稍寧節經通行各該沿海官司嚴加
防守去後續據直隸淮安衛守禦海州中前千戶所

申稱本所僻居邊海地勢孤危即今倭寇未靖江南
北海相去不遠若果突至既無精兵可敵又無堅城
可守查得秋班官軍俱已赴京暫將春班官軍選撥
併同城操屯種軍舍水陸縹緲把截緣春班官軍來
年二月又該起程止存城操等項不滿二百名委果
寡少不足防守及查山東近海登萊等一十七衛所
春班軍餘亦恐倭寇流至該彼處巡按衙門奏請
暫畱防守合無北照山東沿海畱軍事體奏畱防守
待候倭患稍寧照舊赴操等因又據淮安大河高郵
揚州儀真五衛東海通州泰州鹽城四所各申相同

到臣據此會同巡按直隸監察御史劉世魁議照即
今江北災傷重大江南倭寇猖獗一應彈壓姦兇剿
捕海賊拱護 陵寢防守高牆隄備糧運保固江防
皆緊急軍情要務各處雖有官兵把截數亦不多率
皆老弱其各該衛所大小官員多方揀選謀勇出衆
堪充將領之才亦不多得再照 祖陵 皇陵防守
操軍緣無專官統率以致隊伍參差心力渙散必須
委官提調操練方有實效查得中都留守司副留守
許文學材力雄健弓馬閑熟堪以統領前項鳳泗官
軍仍令選擇各衛所堪委官員不拘職銜大小惟才

是用齊備兵器火藥專一操練拱護陵寢防守高牆及西路山東河南湖廣鄰境地方盜賊生發就便知會徐州兵備副使劉天授潁州兵備僉事朱舜民鳳陽府知府熊勉學廬州府知府雷達動調官兵支給糧餉相機撫剿堵截其官軍不用命者即時照軍法細打一面報臣前去監督不得動稱申請以致掣肘有誤軍機仍通行各該衙門知會不許別項調遣庶事有責成緩急有濟其存留春班官軍悉聽海防兵備叅政兼副使張景賢分撥調度淮安太河二衛并海州東海通州泰州鹽城五所共一千五百五十

一員名撥守瓜儀防護糧運保固江防如蒙伏望

皇上軫念地方多事乞勅該部再加查議將鳳泗

各衛所官軍責成許文學訓練專一拱護陵寢防

守高牆及西路山東河南湖廣鄰境地方盜賊不許

別項調遣各衛所春班官軍自嘉靖三十四年爲始

暫免赴京存留分布防守俟倭寇寧息照舊赴操如

此則內虜羣竊之徒外嚴倭奴之備我皇上南顧

之憂亦可少舒矣嘉靖三十三年十一月二十八日

題奉聖旨該部知道欽此該兵部議覆爲照前項

春班官軍各官欲要奏留本地用防不虞是固預戒

之一端但事勢有緩急而酌量有重輕即今倭寇竊發淮泗之地逼近陵寢高牆事亦重大然比之京師其緩急重輕又較然也况今胡虜跳梁即其腹心無日不在關南加以諸陵及盧溝等處工役大興若復奏請前軍不無顧彼失此所據各官具奏相應酌議合候命下移咨本官及都察院轉行彼處巡按御史查將所擬防守事宜嚴督各官一一遵照施行其淮安大河揚州儀真高郵泗州等衛海州東海通州泰州鹽城等所官軍星夜督發前來鞏固京師勿得過時致有短少等因嘉靖三十四年二月初

十日太子太保本部尚書聶 等具題奉 聖旨是
欽此

瓜洲築城疏

題爲懇乞 聖明築城瓜洲以保障地方事先准總
督南直隸浙江福建等處軍務尚書兼右都御史張
谷照得揚州府瓜洲地方切近長江又密通海口
人煙聚集舟車萃止運道經由南北要地近年倭賊
深擾若使由海入江瓜洲首當其患且原無城郭可
以衛民又無垣墉可以蓄衆萬一有警非惟商民被
害抑於運道有妨相應及時議處庶可保障將來咨

煩督同淮揚兵備道行委揚州府知府吳桂芳親詣
瓜洲相度地利必須形勢高敞原隰寬廣於河道兩
岸築立營堡二處牆墉堅峻中可容衆數萬仍開四
門并立營樓墩臺以便瞭望稍如城式垛口戰格將
臺米倉俱各齊備平時議立叅將或守備官員量撥
軍兵操練把守以揚軍威遇警拒戰倉卒之間民或
奔走可以依歸似爲要衝切務其在此時尤當亟舉
仍將督行過緣由并計處過錢糧工料一併咨報等
因又准操江都御史史 容稱瓜洲一鎮切近 畱
都下接海口人煙數多中有五壩寔南北要害之地

原無城郭以障衛之況今倭寇猖獗動輒垂涎以爲口實蓋緣該鎮商賈輻輳財貨堆集所在繁華易以誨盜故也近雖調兵防守終非長策若不及時設置險固以防侵掠其於保障地方甚有未便已經行仰揚州府查議相度該鎮應否修築城垣及動用工價銀兩作何處辦查得北虜入寇近年北直隸山東河南地方俱經撫按行文所屬在於城市鄉村大鎮俱設城堡以固防守應合北照此例以建治之但此地土埂一經風雨輒至圯壞須得甃石乃爲經久通行中呈務於地方有益事體無礙方可施行去後咨煩

會同督行議處等因前來案查臣先歷詣揚州府議得瓜洲應否築城築堡防禦俱行該府及海防道併勘去後續據該府回申行准本府瓜洲駐劄同知唐鉞關稱看得瓜洲雖名一鎮實運道襟喉 留都門戶况當倭寇陸梁海堦密邇其為危急實可寒心節奉部院明文勘議建立城堡無非為保障地方計蓋成大事者不惜費不一勞者不求安築堡不若築城雖費而有益考之前誌唐宋皆嘗有城雖遺跡不可考而今城隍廟尚存則其驗已但原估城牆過於高廣故費亦增加不無可減省者又經本職熟計深思

周咨博訪連日督率經歷晏銳及諸鄉耆保甲長知
因人等親履地止均股較量鳩筭工材曲微備悉輿
情允協衆論僉同比之原估計減三分之一務在堅
緻不徒觀美期於有成不至浮費雖於民居微有損
而實有大造於居民非惟於運道無少妨而實所以
保固夫運道及照即今倭患方滋事勢已迫若非速
爲經理誠恐議論定時事已無及居民財貨姑置勿
論如地方何如 國計何等因及丈量城圍七里九
分九厘設城門四座各上蓋廠廳三間周圍窩舖八
座并隨鋪敵臺水關二座減水閘小水關通江閘小

水關逐一估計合用物料工食銀共計二萬九千六百兩有零備細開關到府准此卷查先蒙巡撫并操江衙門牌劄依奉已經行准本府同知朱哀議稱該職督同千戶方矩經歷晏銳拘集槩鎮保甲長者民顏鵬等議看得該鎮築城於留都蕃蔽益固漕運襟喉無虞又年止全瓜民一鎮而已估計用銀四萬八千五百兩有零開關到府准此議復間奉巡撫衙門劄付准總督軍務衙門咨又經行准同知朱哀關看議築城費用甚多又恐於民居有損且恐於糧運有妨今蒙議建設二堡誠爲簡便合於江岸鎮之東

西各設一堡既以保障江關亦以護衛本鎮或遇倉卒有警居民亦得依歸估計二堡共用銀九千四百兩零等因關府准此隨該本府看得同知朱裒先議築城估用銀四萬八千五百兩零今議建堡估用銀九千四百兩零比與建城之費果爲簡便但跨水築城則運或致有妨而且難料其堅久恐非可成之工省費築堡則官軍雖云可恃而未必足以容民恐爲無益之費必須從長計處方垂永久又經關行同知唐鉞覆勘去後今准前因看得同知唐鉞關稱覆勘過瓜洲鎮應造城垣不必築堡一節爲照瓜洲之地

誠爲江淮喉舌維揚門戶仰蒙總督撫操衙門議行本府築設城堡但築城立堡均爲保民而利害較量不可不審今欲於該鎮東西各立一堡較之築城之費委果輕省但該本府知府吳桂芳細詢民情皆謂民之所以相保原以妻子居室財貨今空立一堡內無井泉薪米房舍即一旦有警則北走府城南渡鎮江家口財物一葦可航孰肯入此空圈之內以蹈坐困之計信似有理至於築城之議該鎮居民一向不願本府屢次詢問輒據告稱壩多土薄不惟有妨運道抑且多礙居民衆口嗷嗷從違不一故本府遲回

數月不敢定擬頃該知府吳桂芳親詣瓜洲會同同知朱東督同江都縣知縣周思久并原估經歷晏銳等周原相度自朝至晡或登陵阜以審其形勢之高低或測井泉以觀其水土之厚薄內經五壩外覽大江蓋該鎮雖近闕江潮然聲自古昔實是土厚水深掘井者動經二三十丈而後得泉此其非浮洲淤沙所積可知也五壩分建內多支河以城包之於中似屬駭聽但壩基支河皆在民居之內而今築城基正包民基之外就民間田園挑築爲城基址本固且環民居之後初無拆毀之嗟揆之地利人情宜無甚拂

其兩港運河雖官民糧運船隻之所必經若其上止作天橋兩傍城頭相峙不必開閘則於船隻往來自無阻礙遇有緊急則或橫鐵索木筏以當關或囊土壅水以拒敵誠固國之要誼扼險之良圖也居民之所以謬稱不便者蓋蚩蚩之民慮恐官府不肯出財將取給於該鎮軍民商賈之家故爾嗷嗷執訴近該知府吳桂芳明白曉諭必不分毫科及於民以故始有欣欣然樂從之念今同知唐鉞再行細估又經減去原估三分之一止用銀二萬九千六百一兩四錢九分八釐則所費益省而大工益似易就矣竊詳

本府所屬如泰興如臯海門雖係縣治然無城之害
似尚止於一縣至於瓜洲漕運咽喉南北孔道比之
三縣尤為要害今三縣無城者已蒙 聖恩俯允版
築就次而瓜洲重地隄防缺略尚有可慮乞行本府
先將應用錢糧工力逐一再悉愚誠議處申奪以俟
本院題 請施行等因據此除臣移咨總督軍務衙
門外會同操江都御史史 巡按直隸監察御史劉
世魁莫如士議得瓜洲地方扼江海而是徐揚控吳
楚而屏 畿甸寔水陸孔道漕運要津且人煙稠密
商賈輻輳姦宄垂涎急宜築城已經議行揚州府知

府吳桂芳公同同知唐鉞朱裒先後踏勘丈圍城基
估計合用物料工食共銀二萬九千六百餘兩數目
前來看得吳桂芳所議瓜洲築城視海門如阜泰興
三縣尤爲要重及咨訪區畫俱已詳明相應依擬再
照瓜洲雖江北地方實南北津要應用錢糧宜聽總
督軍務衙門裁酌均派江南江北各府協濟庶工程
易集但恐江南倭寇猖獗供億不貲無暇及此如蒙
皇上裁察 勅下該部再加查議容令臣督行海防
兵備道叅政該副使張景賢揚州府知府吳桂芳即
便多方惜處錢糧調集夫役定委該鎮駐劄同知唐

錢總理選委屬官分管趨今江北倭情稍寧畫地分

工尅期修築事完之日將完過工程用過錢糧造冊

奏繳奉有 明旨臣得宣布 聖明愛護生靈保固

地方之意庶幾官有法守民有定志築城鑿池計日

就緒可以壯形勢而慎封守禦暴寇而肅戎心矣其

議設叅將守備操練軍兵防守事宜待城完總督軍

務衙門另議外嘉靖三十三年十一月二十八日進

奉 聖旨該部知道欽此該工部議覆看得巡撫鳳

陽都御史鄭 巡按直隸監察御史劉世魁莫如士

等會題稱揚州府瓜洲鎮水陸孔道南北要津即今

倭寇爲患無城捍衛乞要築城以保地方一節爲照
事貴預圖有備無患今以瓜洲巨鎮襟帶諸省拱護
兩京人煙庶繁貨財聚集况當糧運必經之地又值
倭夷猖獗之時乃無城郭障衛非所以固國保民
設險而禦暴也所據建築該鎮城垣誠今日事勢之
不容已者既經各官會題前來相應議處合候 命
下本部備行巡撫都御史鄭 總督軍務都御史張
操江都御史史 及咨都察院轉行巡按直隸監
察御史劉世魁莫如士督同海防兵備道并該府官
員照依原議將瓜洲鎮城垣即行建築合用錢糧工

食等項先查在庫無礙官銀取用如果不敷聽令多方措處選要才幹官屬調集人夫趁時興工務求堅固一勞永逸不得廢法病民別行科擾其城基僅與居民房土相礙亦要估給官價免致失所司府官不時往求巡督提調無容下人侵費官銀苟且完事中間若有未盡事宜徑自從長會處施行完日通將做過工程用過物料支過銀兩各數目覈實造冊 奏繳青冊送部查考等因嘉靖三十四年正月十七日本部尚書吳 等具題本月十九日奉 聖旨是欽此

卷之七終